



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 10

Yangia anidakangma :

Tir Yimyim

tirymyim@aolima

tir yimyim

TAPAK 3

**Alexander-i Acapulco
ATP Title kokogo**

**CM Sangma-i Dandi
sentong nung shilem agi**



VOL. XVIII NO. 157 (ADOK 157) DIMAPUR

TENTONÜ (MONDAY)

METSÜREMI (MARCH) 22, 2021

₹ 5.00

Nagaland nung job reservation policy atema telemtetba magiteter

Kohima, March 21 (TYO): Nagaland sorkar mapa nung 'job reservation' atema working group-i Honibarnü senden ka amen saka telemtetba kecha balaka magiteti tembangogo.

Parnoki ano April 20, 2021 nü ajurutepa senden amentsü lemteter senshi.

March 5 nü 'job reservation policy' atema working group ya tenteta liasü. Iba telok züngsem 15 dena lir aser parnokji cabinet sub-committee nung züngsem 7 aser Eastern Nagaland Peoples' Organisation (ENPO), Central Nagaland Tribes Council, Tenyimi Public Organisation, Core Committee on Rationalization of Reservation Policy (CCoRoRP), Eastern Naga Students' Federation (ENSF), Eastern Nagaland Gazetted Officers Association, Naga Students' Federation o Central Nagaland Students' Association nungi

züngsem kaka lir.

Yashi sendenji Chief Secretary J Alam menden ser State Civil Secretariat nung Chief Secretary indang conference hall nung amen.

Senden nung Eastern Naga teloktemi sorkar mapa nungi 45% meshi aser külen tanügba Naga kintemi reservation policy meyipa repringshitsü ashi.

"Onoki akhangba onüktem angatettepogo saka tanü senden nung telemtetba takang ka magitet aser iba jagi April 20 nü ano senden amentsü" ta Eastern Nagaland People's Organisation (ENPO) president T Kekongchim Yimchunger aser Naga Students' Federation (NSF) president Ninoto Awomi nati ashi.

State sorkari tentettsüba Cabinet Sub-Committee-i sorkari ashiba indang draft proposal bener arutsü aser ibaji senden nung benoka olemteptsü, ta tenatisa ashi.

Nenoki chirnur tarutsü yanglutsü mesüra

Assam raksatsü: Priyanka Gandhi

Sivasagar, March 21 (Agencies): Congress lennir Priyanka Gandhi-i anogo ananü atema Assam semdangi arua lir aser tanü lai ashiba agi voter temi Assam yanglutsü mesüra raksatsü telemtetba agitsü.

Khumtai nung election nüboyimba sentong tulu ka nung jembidang Priyanka-i voter enoktsürtemi kanga dang shisa kaa vote enoktsütsü ayongzüik.

Iba election nung nü telemtetba ajanga nür chirnurtem tarutsü yanglutsütsü mesüra Assam raksatsütsü, ta lai metetdaksü.

"Tesüiba küm pungu tashi Assam nung chief minister tashitait ka mesüi chief minister ana inyakogo" ta Priyanka Gandhi-i ashi.

"Nenok dang nür Chief Minister ji Assamese nunger asütsü ta nangzüik. Nenok dang nür Chief Minister-i sorkar tashitait ketdangsütsü ta nangzüik, saka nenoki kechi angu" Chief Minister ana angu" ta lai shi.

Assam nung CAA anema lungkak aitba atema Priyanka-i Prime Minister Narendra Modi aitsü.

Iba ashishitep aketba Act agizükba atema PM Modi-i kodanga aria mebilemtsü, ta lai ashi.

"When anti-CAA protests were at its peak in Assam, why didn't he felt sorry? Where Assam was burning, why didn't he felt sorry? Why didn't he appeared before you? Why didn't he apologised then?" asked Priyanka Gandhi asked the people.

"Assam nung CAA anema lungkak aitba tiyalong nung kechiba pai aria mebilemtsü? Assam nung mi adokdang pai kechiba aria mebilem? Kechiba pai tamalen nenok dangi maru? Kechiba pai iba mapang tu tatok memeshi" ta Priyanka Gandhi-i tanü asüngdang.

"Taoba election nung BJP-i mapa lakh 25 agütsütsü nangzüik. Nenoki item mapa ngur asü masü? Mangu" ta Priyanka-isa metetdaksü.

"Nenok dang Assam Accord nung Clause 6-i nenok sobaliba kümzüika ayur ta ashi aser ibaji mapa küma inyaktsü ta nangzüik. Saka tanü tashi ibaji meinyak" ta Priyanka-isa shisem.

CBSE Class 10, 12 kaketshirtemi 'Improvement' atema maongka angutsü

New Delhi, March 21 (Agencies): CBSE board exams agütsürtemi improvement papers agütsütsü atema maongka angutsü.

Tesüiba mapangbo, kaketshirtemi board exams nung ano marks tajungba angutsü atema küm ka atatsüsa aküm, saka Central Board of Secondary Education (CBSE)-i ibaji academic year tsüngda nung inyaktsü melaogo.

Iba ya National Education Policy (NEP) nung shilem ka lir. Iba policy nung kaketshirtem

nem maongka aika agütsütsü benoka lir.

Temzüng tasen ajanga class 10 aser 12 kaketshirtemi subject mashii ka atema improvement papers melar.

Iba atema kaketshirtemi compartment exams agütsütsüla aser ibaji main exams temli agitsü. Iba tatidang ana nung marks timtiba anguba results nung agitsü, ta CBSE-i metetdaksüogo.

Iba temzüng tasen ya May ita nungi agitsü aliba CBSE board exams 2021 nungi tenzüksü.

Nagaland sorkari Naga Integrated Settled Farming tenzükgogo Ango tzübo 161, ak metsüdak 44 yangluogo; tanga mapa aika inyakdar



March 20, 2021 nü Boke-Botsa nung aliba Naga Integrated Settled Farming tesem nung Agriculture Production Commissioner (APC) Kikheto Sema-i department balala nungi ketdangsürtem, NISF consultant aser yimdaklirtem den külemi agiba noksa angur.

Kohima, March 21 (TYO): Nagaland sorkari Northern Angami region kübok Boke-Botsa nung pilot project - Naga Model Integrated Settled Farming (NISF) tenzükgogo.

Iba mapatong ya Agri & allied departments den yaritepa tenzüik.

Iba mapatong ajanga department 9- Agriculture, Horticulture, Fisheries, Land Resources, Sericulture, Soil, Veterinary & Animal Husbandry, Water Resources Department aser Nagaland Bee & Honey Mission külemi longjemdaksüogo.

Iba mapatong kübok tentetba 'farming clusters' ajanga aluyimertem yaritsü ta February 12 nü Governor R N Ravi-i State Assembly nung jembidang metetdaksüogo.

Iba mapatong ya District ajak nung inyaktsü, ta paisa shisem.

Taküm February 18 nü Chief Minister Neiphiu Rio-i budget 2021-22 onük jembidang, state sorkari Naga Integrated Settled Farming (NISF) ta ser cluster agri renloktsü atema sentong renemer ta ashi.

"Mezüngbuba mapatongji Boke Botsa nung inyaktsü aser iba sülen tanga district tem nung inyaka aotsü. Kasa mesükba maparen tanga department temia sentong renemdar" ta Rio-isa metetdaksü.

Sorkari district ajak nung Farmer Markets lapoktsü aser itemji local products, organic food ayoktsüba den alu nungi shishilembadaki belentsü lenmang ka asütsü ta paisa ashi.

Nagaland Agriculture Production Commissioner (APC)

aser working group indang team leader Kikheto Sema-i yashi iba tesem semdanga liasü.

Covid wara ajanga Naga nungertemi tanga state tem nungi supply aruba nung dang metaloka aliba kuli nguogo. Iba jagi lockdown mapang asenoki tetsükdaksü aika ajuru, ta Kikheto-i ashi.

Agri & allied departments-i kanga dang meranga inyaka aruogo saka state nung chiyungtsü aser shi nüngdakba meperir. Boke-Botsa nung NISF-i department balaka külemi inyaktsüba model ka tenzüksüogo aser iba ajanga aluyimertem renloktdaksüba aser rongsenkettsüing jenjang tajungba akümba dang masü saka state-i nüngdakba peritsütsü, ta paisa metetdaksü.

Naga ali kanga tajung aser temo keta lir. Iba jagi tsünüsenbongtsü aika yokteter. Department balala külemi longjemer inyakba ajanga takok tulu angutsü imlar, ta APC Kikheto-isa ashi.

"Tanü alima tensa repringdangra, yakta chiyungtsü agi anüingba wara ajurutsü. Anugji asenok renema alitsüla aser iba nung Integrated Settled Farming ya kanga tongtipang lir" ta paisa shisem.

NISF-i ali acre 786.40 nung terrace paddy cultivation, intercropping, vegetables & fruits plantation, piggery, fisheries, poultry & duckery maparen inyaker.

Integrated Settled Farming ya tesem tajungtem nung inyaka aotsü aser iba nung agri aser allied department tem yaritepa

aotsü. Iba nung mapa manguba lanurtem aser sorkar mapa nugi sodi ngur alirtemi shilem agitettsü, ta Kikheto-isa metetdaksü.

Item clusters ya Farmers Producer Organization (FPO) tentettsü. Naga Model Integrated Settle Farming ya business model ka akümtsü aser iba jagi Agro-Eco Tourism atema lenmang lapoktsütsü ta paisa ashi.

Iba mapatong nung tamakok anguba department dak ozüing tapet agi merenshitsu. NISF Boke-Botsa tenüing nung senotsü tim mesüi amshiba malitsüla, ta paisa kümdangtsü olen ka shisem.

"Ango tzübo 161 tuogo aser department-i ango chanu agütsütsü" ta Fisheries and Aquatic Resources Director, Kevisha Kense-ia ashi.

Soil and Water Conservation Department Additional Director, Khekiho Shohe-ia ashiba agi, department-i soil health management aser treatment atema NSIF tesem nungi ali agitetogo.

Ak metsütsü atema Veterinary and Animal Husbandry Department-i ak techanu 44 agütsütsütsü ta metetdaksü.

Botsa village council-i shimba Boke-Botsa NISF, Project Committee chairman Thepfusato-i ashiba kimung 175 nung ali kiburtemi iba mapatong takok ngudaksütsü atema department balala den yariteptsü.

"Sorkar department balalai kibong ka ama rongsenkettsüing jenjang ajungkettsü atema inyakba atema pelar" ta Botsa village Gaon Burah Pfheliezhi-ia ashi.

COVID-19 Nagaland: Anogo tibuba nisung shinga dak-a meputet

Kohima, March 21 (TYO): Nagaland nung anogo ti atongtepa nisung shinga dak-a COVID-19 meputeti aruogo.

"Tanü nisung shinga dak-a COVID-19 aliba meputet" ta Health & Family Welfare Minister S Pangnyu Phom-i metetdaksü.

Nisung 12,225 rongnungi 11,978 taneptsü nguogo aser Nagaland nung COVID nungi

taneptsü angurji 97.98% lir, ta Health & Family Welfare Director, Dr Denis Hangsing-ia ashi.

Covid puteta alir nisung 91 asüba nungi parnok 10 bo tanga timtem ajanga asü aser nisung 154 tanga state temi ogo ta paisa ashi.

Kohima aser Mokokchung nung nisung kaka anepaludar

aser tena rongnung Mokokchung nung anepalur dak shirangba yimya tera lir, ta Dr Hangsing-isa metetdaksü.

"Nagaland nung COVID-19 alitsü akok ta temolung melemi bilemba sample 1,34,886 tendangogo. RT-PCR ajanga 75,321, TrueNat ajanga 37,496 aser Rapid Antigen Test ajanga 21,069 tendang" ta paisa shisem.

KOCC-i maneni mürekmejuba sentong ayongzük



"Keep Our City Clean" kübok High School area Kohima nung March 20, 2021 nü social work agidang tangokba noksa ka yangi angur.

Dimapur, Metsüremi/March 21 (TYO): Keep Our City Clean (KOCC) team den dangartem dener March 20, 2021 nü state yimtiba, Kohima nung mürekmejuba sentong ka High School area temeket aser telung nung ayongzüka liasü.

Iba lokti nübudok sentong nung Peraciezie Christian Revival Church, Peraciezie Baptist Church, Yorübam Students Organization Kohima

aser temolungertem dena liasü. Iba lokti nübudok sentong metenzük dang sentong tongmelang ka Bright Morning Star Children Home (BMSCH), Kohima indang Superintendent, Aleno-i anir agi.

Iba sentong nung Shenti aser Lindi nati temeja ken aten, Nagaland Archery Academy IG Stadium ajanga saya ka sayu, Flex Appeal Gym züngsentemi temang sayu aser BMSCH

nungi tanurtemi ken ka aten.

Maneni iba sentong nung KOCC convenor Khriehuzo Lohe, High School Panchayat chairman Atuolie Mepfhuo aser Bayavü Panchayat Chairman, K. Rengma nungertemia o tatsütsü jembia liasü.

Taruba social work ya March 27 nü Kohima Ao Baptist Arogo lanurtem den lungjemer Phoolbari nungi TCP gate tashi nung alitsü.

Nübur atsüa arutsü mechi Assam sorkari machinery tem amshir: Congress

Guwahati, Metsüremi/March 21 (Agencies): Sorkar meyong machinery tem tim masüba nung amshir aser Model Code of Conduct nung aibelener, ta Assam Congress indang legal department ajanga Election Commission dangi zülü.

Assam sorkar indang Department of Panchayat and Rural Development ajanga PMAY houses indang mapa ajunga March 27 matongdang renemer alitsü totuyuba agütsü,

ta Assam Congress-i aitsür. March 27 nungi Assam election tenzüksü lir.

"Ibai yimtenren tsütsü nükjidong ka yur inyaker ta ajiteter aser vote agütsüsupur iba ama totuyuba yagi atsür arur. BJP nübuyim ya shia aliba Department ajanga BJP sorkari model code of conduct nung aibelena inyak. Sorkari iba ama maparen inyakba asoshi Election Commission ajanga tapet temerenshi agütsüsüla aser sorkar machinery amshitsü

merangba nokdangtsüla," ta Congress party ajanga sangdong ka nung ashi.

Party ajanga chief electoral officer, Nitin Khade nema memorandum ka agütsüogo, kong assembly polls atema model code of conduct (MCC) benokaka Chief Minister Sarbananda Sonowal-i state guest house mazüngtsüba asoshi tekeratiba nung mera agitsü ajungshia shia lir. Chief Minister Sonowal-i state guest house ya par ki ama amshia arur.

JP Nadda-i March 23 nü BJP manifesto sayatsü

New Delhi, Metsüremi/March 21 (Agencies): Bharatiya Janata Party (BJP) national president JP Nadda ajanga Assam nung Assembly elections agitsü aliba atema party indang manifesto March 23 nü sayatsütsü.

Congress party ajanga Deobarnü Assam Assembly elections asoshi par manifesto sayaogo aser party-i sorkar tentetra Citizenship Amendment Act ya tazüngla kumtsütsü nangzük.

Congress manifesto nungsa

sorkar mapa lakh pongu, kinungtsü nem ita shia sen 2,000 aser angati electricity unit 200 agütsütsü nangzüka lir.

Kasa mapang Assam nung Bharatiya Janata Party sorkar arutsü jangjaogo, ta Ato Kilonser Narendra Modi-i Deobarnü sangdong.

"Gol ana aliba NDA sorkari metzü meshiba tesemtem, LPG gas, electricity aser angati temang anepaluba amala maongka agütsür. Tang asenoki tzü tashi bushitsü asoshi inyaker," ta pai Golaghat nung ashi.

2016 küm BJP ajanga Assam nung sorkar tentetra Congress-i küm 15 yimsü asüba tembanga liasü.

2016 election nung BJP aser par den sendaktepa aliba AGP aser Bodoland People's Front (BPF) lungjemer menden 126 aliba assembly nungi menden 86 nguteta liasü.

Taküm Assam nung Assembly menden 126 atema election ya phase asem kuma lemsar March 27 nungi April 6 tashi agitsü lir aser iba osang ya May 2 nü sangdongtsü.

NSCN, ENNWU ajanga metongshitsür

Dimapur, Metsüremi/March 21 (TYO): Eastern Naga National Workers Union (ENNWU) ajanga March 20, 2021 nü sangdong ka agütsüba nung metokmeperi kar ajanga ENNWU nungi NSCN/GPRN indang Collective Leadership nung züngsem tenüng meinoksemba mechi tanaben iba osang ya sangdongtsüsa akumer, ta National Socialist Council of Nagalim nungi Eastern Naga National Workers Union (ENNWU) ajanga sangdong ka nung ashi.

Angba Konyak, Kilonser ajanga Thanksgiving address mapang ENNWU dak temolung lemteta aser UT indang Caretaker CAO ama Thsanfu, Kilonser nem mapa nungloktsüba asoshi sorkar

dang pelaba shia liasü.

Tongmeth Wangnao ya Vice-President, GPRN ama shimetba aser ENNWU kübok Region ajunga tenüng nung Collective Leadership Members ama tsünglanglen agüja aliba nübutem shimetba asoshia pai sorkar dang pelaba lemsatapa liasü. Collective Leadership Members yamai alitsü:

1. TT Among Sangtam
2. B Moba Chang
3. Tokim Tikhir
4. Shahoto Yimchunger
5. M Longshen Khiamniungan
6. Alam Konyak
7. Meyong Phom

Aser Cabinet Secretary to S Among Lim atema post agütsüba asoshia pelaba lemsatapa liasü, ta sangdong ajangasa ashi.

Assam Rifles temi Kushiabil nung Essay zülutepba sentong ayongzük



Dimapur, Metsüremi/March 21 (TYO): HQ IGAR (North) kübok Assam Rifles, Dimapur Battalion ajanga March 19, 2021 nü 'Ekta Bharat Shreshtha Bharat' omen nung ajemdaker Government High School Kushiabil, Dimapur nung essay zülutepba sentong ka ayongzüka liasü.

Iba sentong nung kaketshirtemi India nunger nüjiso ngur küm 75 ajungba aser

nüjiso bushirtemi shilem balala agiba indang zülua liasü.

Kaketshirtemi iba sentong nung tejangraba tulu nung shilem agi aser iba tetoktepba nung tematiba jenjang nguteter nisung asem nem senpet agüja liasü. Assam Rifles temi iba ama sentong tajung ayongzüka asoshi school ketdangsür aser kaketshirtemi pelaba lemsatap. Iba tetoktepba nung kaketshir 22-i shilem agia liasü.

Tripura: Sepahijala nung ganja seret 1170 apu

Agartala, Metsüremi/March 21 (Agencies): Tripura nung Sepahijala district kübok Sonamura sub-division nung aliba Kamal Nagar nungi security forces temi sen lakh 50 dak tema alang ganja seret 1170 nguteta liasü.

Police, Tripura State Rifle (TSR) aser Assam Rifles tem lungjemer mita bushiba mapang iba temesepba chiyongtsü ya nguteta liasü.

Iba dak sendakba nung police temi nisung asem pua liasü aser parnok ya Charu Mia, Mantaz Mia aser Rasid

Mia ta jangjatetogo. Kasa mapang police temi nisung asem anema ken o ka benoka lir.

Iba operation ya Kamal Nagar nung March 19 anüngdang anjong meshia nung tenzük aser Honibar nikongdang tashi agia liasü.

Ghonda aika mita bushiba sülen parnoki pua aliba nisung asem alidak anasa arem nung ganja taking ya drum 26 nung toteta liasü.

Item temesepba chiyongtsü ya Bangladesh leni shibelena yoktsü liasü, ta police temi ashir.



Mangkolemba Baptist Arogo women ministry-i achayanga kiyim lanurtem asoshi shisadokten sentong ka 'Tayimjem' omen nung ajemdaker March 19 nungi March 21, 2021 anogo tashi Mangkolemba Baptist Arogo nung ayongzüka liasü. Iba sentong nung shisalen sayurji Rev. S. Wati, Principal, DBC aser pa kinungtsü Imtizüngla na liasü.

Linükyangerba nung Manipur nungeri shilem agitettsü: CM Biren Singh

Guwahati, Metsüremi/March 21 (Agencies): State ya human resources tsütsü takar liasü, shirnoki pei jangraba wadang nung tematiba jenjang tongtettsü sempet lir, ta Manipur chief minister N Biren Singh-i Deobarnü ashi.

Imphal Sainik School nungi taküm National Defence Academy (NDA) examination nung takok angur kaketshir 12 nem tenüsang agüja jembiba mapang, Sing-i iba o ya ashi.

Pei jangraba wadang nung takok angutsü aser linük

yangerba nung shilem agitsü asoshi Manipur nunger kaketshir dak sempet lir.

"Taküm Sainik School Imphal nungi tebur 12-i NDA tatidang nung takok ngutetba ajanga Manipur nunger saisapong aser sobaliba nung kisüng masü saka ano danga wadang nunga nübu peria aliba sayuteter. Linük tenzüksü temolungtetba nung meranga inyakra Manipur nungi kaketshirtemi wadang mashi nung temaba jenjang tongtettsü," ta N Biren Singh-i tweet asü.

CM Sangma-i Dandi sentong nung shilem agi



Deobarnü Kareli nungi Gajera tashi Meghalaya chief minister Conrad K. Sangma-i padyatris 80 den Dandi March nung shilem agiba noksa ka angur.

Shillong, March 21, 2021 (Agencies): Deobarnü Gujarat kübok Vadodara district nung Meghalaya chief minister Conrad K. Sangma-i tanga padyatris 80 den Kareli nungi Gajera tashi Dandi lenmang nung jajaogo.

Sangma-i tetsüingda kilometer 15 tashi Dandi March nung shilem agia liasü.

March 12, 2021 nü Azadi Ka Amrit Mahotsav sentong lapokba mapang, Ato Kilonser Narendra Modi-i Sabarmati Ashram nungi "Dandi March" ya tenzüksü. Iba sentong ya April 05, 2021 nü tembangtsü.

"India nüjiso ngur küm 75 ajungba benjungmung aser tesüiba küm 91 tejakdang British yimsüsüba anema noktaksü nükjidong nung Mahatma Gandhi-i tenzüksüba mapatong bilemtetsü asoshi iba Dandi March ya tongtiband lir" ta Chief minister Sangma-i ashi.

Kareli nung Minister of State, Gujarat Vibhavari Dave den külemi Sangma-i Gandhi nem akhüm tetushi agütsü.

Dandi tesemi aoba mapang Gandhi anenba yimtsüing rongnung Kareli ya ka lir. Kareli kübok Gandhi anenzükba tesem nung Gujarat

Sorkari azü ki tem anepalur.

"Dandi March ajanga alima nung nüburtem teshisadangba melenshitsü. Iba mapatong ya nisung 80 agi dang tenzü, saka melung melungi British yimsüsüba anema noktaksü asoshi iba March nung nisung lakh aika aden," ta pai ashi.

Kareli nung padyatris tem den jembiba mapang, India sensopur ka ama nümatanga bilemtsüla ta pai lanurtem dang ashi.

"India nung ama, Gandhi aser tanga lennirtemi taküm bendanga agüja inyakbatem asenoki kodanga mamatsüla. India nüjiso atema parnoki tongti shilem agiogo," ta Conrad-isa ashi.

Dandi March tanaben shilem agitsü asoshi Chief Minister ajak jaokba atema pai Ato Kilonser Narendra Modi dang pelaba metetdaksü dang, "British yimsüsüba anema noktaksü asoshi Bapu ji maparen tenzüka tesem tonga arutsü maongka anguba asoshi pelar. Iba den külemi Dandi March nung tanaben shilem agitsü onok nem maongka agütsüba atema pelaba shisemer," ta Sangma-i shisem.

Northeast nung terenlok

maparen atema Ato Kilonser Narendra Modi ajanga maparen balala achaayangba indang pai telok dang metetdaksü.

"Lai (Modi) Northeast atema kanga temulung agüja inyakdar, koba küm aika mereprangi yuja aru. Ajisiüaka, Ato Kilonser lenisüba kübok Northeast tesem renloka aruba asenoki ngudar. Pai northeast tesem 15ben dak tema semdangogo aser iba den külemi Union Minister ajak dang northeast tesemtem mapang shia semdangtsü asoshi tetuyuba agütsüogo. Northeast atema Ato Kilonser Modi-i mapatong balaka yanglutsüogo. Ibayongji northeast nübur tenüing nungi ni pa dang pelaba metetdaksü," ta pai ashi.

Sangma-isa, British yimsüsüba anema noktaksa mapang Meghalaya nung ana densema Northeast nungi nisung aika dena liasü ta sentong nung adenertem dang ashi.

Khasi, Garo aser Jaintia Hills nung U Tirot Sing, Pa Togan Sangma aser U Kiang Nongbah nungeri British yimsüsüba anema noktaksa indang Sangma-i telok dang metetdaksü.

Jana bendentsü atema AMC-i project ka tenzüksü

Aizawl, March 21, 2021 (Agencies): Ramhlun South Aizawl nung tang tasen tentetba Aizawl Municipal Corporation (AMC)-i mezüing project ka ama ki tashi tsüingdong oa (door-to-door) jana bendenba mapatong ka tenzüksüogo.

Ramhlun South ya Ward - IV kübok aiter.

Ki tashi oa jana bendenba maparen ya Mizoram State nung mezüingbuba inyaker. Iba mapatong ya Honibarnü Ramhlun South nung AMC mayor Lalrinenga Sailo-i tenzüksü.

Iba sentong nung jembiba mapang Sailo-i, Aizawl ya yimti temerük akümtsü asoshi Mizo National Front (MNF)-i aniba AMC ajanga jana bendenba maparen junga achaayangtsü.

Iba 'door-to-door collection system' mapatong ya Ramhlun South nung dang masü, saka Aizawl kübok tanga tesem nunga tenzüksütsü sentong lir, ta pai ashi.

AMC executive councillor

Laltlangzova Khiangte-ia ashiba agi, Centre indang Swachh Bharat Mission mapatong pusama, municipal tesem telungtet nung tarensen agi jana bendenba aser merükmejuba inyakyim nung rangloker municipal corporation-i inyaktsü.

Iba inyakyim tasen kübok mapa inyakertemi ki tashi tsüingdong oa janatem bendentsü, ta pai ashi.

February 16, 2021 agiba AMC polls nung, seat 19 nungi MNF-i ayong ayonga seat 11 angu. Kasa mapang State nung tongtiband opposition party Zoram People's Movement (ZPM)-i menden 6 aser Congress-i menden 2 takok angu.

Ano külen, BJP shirnoki seat tuku atema toktepa liasü, par teloki seat ka danga mangu.

Seat 19 nungi seat 6 bo tetsürtem (33 %) atema alitsü (reserved) aser item seat nungi ZPM-i 5 aser MNF teloki seat ka angu.

Mizoram Municipalities Act, 2007 kübok 2010 nung AMC ya tententa liasü.

BJP züingsemtemi Congress candidate Borgohain amak



Jorhat, March 21 (Agencies): BJP züingsemtemi Thowra constituency nung Congress candidate amak. Iba constituency ya Jorhat district kübok lir.

Deobar anüingdang Susanta Borgohain-i Thowra nung election atema nüboyima senzüdang amak ta osang angazüker.

Iba lendong ya Rajmai Tea Estate kima nung atalok. Shirnoki iba mapa ya

inyak'ar ano mejangja saka Susanta Borgohain-ibo Thowra constituency nung BJP candidate Kushal Dowari pusemertemi pa amak ta tai tongloksüogo.

Haflong constituency nunga kasa lendong atalokba osang angazüker.

"BJP züingsemtemi Congress karyakarta garitem amak" ta All India Mahila Congress General Secretary, Danasari Anasuya-i ashi.

Dima Hasao nung DNLA züingsem ka khaset

Guwahati, March 21 (Agencies): Dima Hasao Policeden khatepdang Dimasa National Liberation Army (DNLA) züingsem ka khaset.

DNLA telungpurji Black Dimasa ta jangjaogo.

"Dima Hasao kübok Purana Hajong yimtsüing nung Honibar nikongdang khatep," ta Additional director general of police (law & order), Assam GP Singh-i metetdaksü.

Iba mapang DNLA züingsem ka khaset aser paji Black Dimasa ta jangjaogo ta

paisa ashi.

Pa ket nungi pistol ka, injang aser sen ngutetogo, ta GP Singh-isa shisem.

Dimasa National Liberation Army (DNLA)-i April 15, 2019 nü parnok telok tentetba osang metetdakja liasü.

Parnoki linük atema inyakba asentenshir aser Independent Dimasa Nation atema raratsü ta DNLA-i ashi.

DNLA nung 'chairman' ji Naisodao Dimasa aser 'home secretary' ji Kharmindao Dimasa lir.



Congress lennir Priyanka Gandhi-i Assam nung election atema nüboyimba sentong ka nung jembidang agiba noksa angur. Priyanka-i anogo ananü atema Assam semdangi arua lir aser tanü lai Centre aser state nung BJP sorkartem aija jemb. "Assam nung 6th graduate aser 10th postgraduate mapa mangu lir" ta Priyanka-i ashi.



TIR YIMYIM YIMOBILEM (EDITORIAL)

DIMAPUR TENTONÜ, METSÜREMI (MARCH) 22, 2021

JANGRATEMA ASAYAR

Mokokchung town kübok kümteta aliba mepu (ward)-tem rongnung football asayaba asayamong tajung ka, Marepkong Youth Association-i March 9 nungi 20 nü tashi kecha mepetmesü melii football benjongmong sentong tuluka tasayartem dang nungibo ano tereprangertemang jangratatempa ta amongtsüsa ayongzüktetba asoshi asenok ajaki parnok nem tenüngsang agütsütsü tetemsü. Parnokji football asaya nung akokertem dang nungibo taoba, kechiyong parnokji ayongzüktetba agi asayartema pei sempet salatsü maongka angu aser Mokokchung town-a telongsoba aser telemlaba kümdaktsüogo. Iba asayamong nung mepu tertrok tashi nungi lanurtemi shilem agia asayaba mapang Mokokchung district nung alir lanurtemia alima nung nungtugu football asayartem den kasasa asayatetsüsa sempet keta aliba reprangtetogo. Ajisüaka, iba sempetji pei taküm aser pei lima asoshi tajangzük aser tenüng tajung bener aruteta amshitsüsa asenoki mapa agi ajungshia maongka lapoktsüba mangur. Shiba südir süang pei taküm aser pei lima nungtugu kümdaktsütsüsa inyakbaji pei nem moatsüba sempettem tajungtiba nung amshitsüsa lenmang lapoktsüba aser maongka anguba nungi tenzüker. Aji oda, Mokokchung Inter Ward Football Tournament nung mezüng takok jenjang angur Artang ward asayar teloki anir mepu shia nungi asayartemi asayabaji tereprangnüsüka aser jangratemtsüka repringogo. Item jagi, parnok masü, asen lima nungtugu kümdaktsür. Mokokchung district nungi yimsüsür, tesayur aser Tsüngrem tenzüker tajung aika adoker. Ajisüaka, alima yimya asünungji, Mokokchung nungtugu akümbajibo Mokokchung district nung alirtem kentenmenü, saisapong aser sübosülemtsü nung tangar dang nungi tama aser alakteta ajungba agi alimai tetshitsüsa akümer. Tanü kasa sempettemji Tsüngremi Aotsür Aor lanurtem nem moaja lir. Itemji asenok Aor lu aser Aor wadangtem lir, anungji ken, asaya aser sübosülemtsütemji asen mapa kümer tangar dang nungi tajungba asayatsü, atentsü aser yanglutsübaaji asenok asoshi tongtibangtiba teinyaktsü asütsüla. Tanü asenok yimten aser lokti lenirtem aser kaketerēju tapu balala anepalurtem asoshi ibaji tayongzüktetba tuluka asütsü. Alima nung mapa aika tangar dang nungi ajizüka inyaktsü saka saisapongba aser kentenba mapatem yabo pei dak sempet melira tangar dang nungi ajizüktetba kisüng agibo pei taküm nung mapa küma moutettsü. Aji oda, asen lima nung sempet aketba asayar lanur paika ya moaja lir, ajisüaka parnok dak aliba sempetji alimai memetet ser rema yutsütsübaaji tapayutsüka aser aji parnok asoshi dang masü saka asenok ajak asoshi takoksa tulu asütsü. Tanü asen lima nung lanurtem rongnung mapa manguba tebilemstü yaa, jungjunga bilemdangra, asenoki lanurtem dak aketba sempet amshia inyaktsü lenmang melapoktsütetba ajanga lir. Aji oda, football kanga junga asayatsüba aser ken kanga junga atentsüba lanurtem dang asenoki parnok sempetji alimai meteta amshitsüsa ajungshia item wadang nung tajung kümdaktsür masü saka item sempetji yutsür government mapa tilaka inyaka alitsü ajungshir. Iba jagi asenok leper tasüng sempet mamshitet rema lir. Asenoki lanurtem dang asaya nung ajungtsü ajungshir saka asayadak maka, parnok kong sayia ajungtsü imlar ? Tang asayaba ground-jia tsünglu aru nungbo koma sülar asenoki temetet dang ! Joko, tang yabo Mokokchung district kübok sub-division shia nung international standard nung football kakabo yanglua kanütsüka ser nung Mokokchung town nunga süng kata maka timtemer. Ashi, football association-i Inter-Club aser Inter district asayamong Mokokchung district nung ayongzüka Mokokchung town nung dang masü saka sub-division shia nung match kaka ananabo asayaa mongtet nungbo, Kisama nung Hornbill festival amongba dang nungibo ano iba Sports festival-jiang telongsoba aser nungtuguba kümla. Aji oda, tanga lima cultural festival agi longsor süra asenokia asenok lima ya Sports aser Music festival agi longsudaktsütettsüla. Longsuba nungji lokti aser kija kibong tajangzük aika lir aser memeteti nisung tajung aika adokadoker. Asenok party politics dang jembia election ataba agi asen lima merenloktsü, saka Marepkong lanurtemi apitetba ama, nisungtem longsulongua adenshia alidak lanur sempet tajung aketertemi pei tajungtiba agi pei dak aketba sempet tajungtiba nung tajangzük lia sayutettsüsa sentong ayongzüka maongka agütsüra, iba jagibo asen limaji tashi itita aser nümadangtetdangteta shia arutsü aser asayartema maneni jangratema tajungba tajungba küma asayatsü aser tereprangertema jangratema repringteptsü.

OLEMSABANG

TENSA DEN PETA CHUBATEM KAKET AZÜNGBA

~ Dr. Temsüyanger, CTC, Aolijen

(Yashi adok nungi...)

Sociolo-scientific method amshia Solomon yimli, lokti-tentet aser inyakyim kar bushiba nung ngutetba kar:

Solomon Yimsüsüba Temang (structure) Telemsa (I Chubatem 4:7-19)

Israel otsü nung, Israel nüburtemi chuba yimli ka yangertsü tongtibang süa akümbaji lemanng asem ajanga lir. Mezüngbuba nung, laiputishirtemi ashir, Dawidi pa chuba mapang Kanaan chuba yimlitem aika maktet aser item yimlitem pa yimsüsüba küboki ait. Kodang item yimlitem pa tashi küpok-i ait, Dawid kangasa tashi tulu yimsüsür ka kümadok. Item yimlitem madak yimsüsütsü atema chuba yimli tasen ka nüburtem asoshi nungdaka aküm. Tanabuba nung, Philistia nungertemi aiben parnok amokmeren, aser tsüngtoktsü merang, anungji chuba yimli ka nungdaka aküm. Asembuba nung, Israel nüburtem rongnung kin balala tsüngda temulung malemtep aser tashi toktepba adokadok, ibaji ajanga chuba kati parnok anitsü asoshi nungdaka aküm.

Otsü-i ashir, Dawid chuba mapang pai Egypt aser Phoenicia yimten yimli aser yimsüsübaren aser inyakyim angazüka iba model Israel yimli nung amenlok. Egypt aser Phoenicia nungi yimsüsür aser tashirtem jaok, aser Israel nung lenirtem nem lemanng tajung parnok sayu; yamaji parnok külemi Israel asoshi yimsüsübaren tasen aser inyakyim tasen yanglu.

Dawid chuba-i Israel nung tejen yimsüsüba aser sobalibaren den, pai bena aruba tasen yimsüsübaren külemi yangertettsü merang. Pai par tejen yimsüsübaren aser inyakyim anema kecha meinyak. Anungji nüburtemi pa yimsüsüba tasen anema apusoba, mesüra temulung malemba Dawid mapang nung maliasü.

Dawid sendong aser mapadong ajanga par chir Solomon tali tashi akatsü maongka lapoktsü. Dawid aser Solomon chubai yangertetba yimden-yimli tasen aser inyakyim tasen ajanga par tejen sobalibaren aser tejen yimden-yimli inyakyim ajunga tashi maiti kümdaktsü.

I Chubatem 4:7-19 nung angur, Solomon-i pa yimli yimsüsüba temang yanglushi (reorganization). Laishir mungintem kar-i ashir, Solomon-i pa yimli yimsüsüba temang yanglushiba ajanga par sobalibaren, kin-kidong ali lumang telemsatem (traditional boundaries) aser inyakyim atsünga aruadok. Aser ibaji ajanga par tejen sobalibaren nung lenirtem (traditional leaders) tashi aser par inyakyima atsünga aruadok, anungji parnok tashi meit-i aküm. Anabuba nung, Solomon-i pa sadema yimsü asütsü mechi, pa asoshi kechi tajungba asütsü aji dang bilema province-tem lemsa, aser item province-tem shia nung governor tekolak sür pa lenisüba nung yutsü. Asembuba nung, Solomon-i tax akhangtsü, aser tashiyim agi nüburtem nübu (force labour) mela-mela akhangtsü asoshi pa yimsüsüba temang yanglushi. Pezübuba nung, tebu Dawid-i alinük tasen aika maktetta yutsübatem ajunga Solomon-i pa yimsüsüba temang yanglushiba (reorganization) nung enok. Anungji, temeyoktep nüburtem aser lenirtem aika pa yimli nung liasü. Ibai Solomon-i pa ajangzüktsü asoshi inyak. Anungji tashirtem aikati ashir, Solomon-i tebu Dawid yimli yanglushibaji yimden-yimli yimsüsüba, rongsensüba aser alinük asoshi tebilembatem yur inyak.

Solomon mapang province-tem balala nung governor aser parnok tenüng:

District/Province-tem	Govenor/Tenüng
1. Hill country of Ephraim	Ben-hur
2. Makaz, Shaalbim, Beth-Shemesh	Ben-deker
3. Aruboth, Socoh, Hepher	Ben-hesed,
4. Nepthath-dor	Ben-abinadab(Son-in-law of Solomon)
5. Taanach, Megiddo,	Bethshean Baana
6. Ramoth Gilead	Ben-geber,
7. Mahanaim	Ahinadab (Son-in-law of Solomon)
8. Naphtali	Ahimaaz
9. Asher and Bealoth	Baan (Son of Hushai)
10. Issachar	Jehoshaphath,
11. Benjamin	Shimei,
12. Gilead (Gad)	Geber,
13. Judah nung	lenir ka (chuba kubok asütsü akok)

Item governor-tem rongnung Solomon anük-apang ana tashi angur. Kanga tongtibang distircts nung governor agütsüba asenoki angutsü. Iba yagi ashir, Solomon yimli kibong kati yimsüsüba yimli aküm.

Solomon-i tejen kin-kidong lenirtem nungi masü, saka shiba shia-metet aser shibai pa nem teyari agütsü, item nungi governor shim. Anungji Laishir mungintemi ashir, Solomon-i Kanaan nung-a governor asütsü asoshi shim, saka parnokji Israel nüburtem dak keta sena aser meima mali asü. Talisa, Solomon-i par tejen sobalibaren yimsüsüba aser lenirtem akoktsü asoshi ibai inyak ta aikati ashir. Solomon-i ano governor-tem aika Yihuda nungiang shim, kechiaser pa Yihuda nungi liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Sayutsüngir Luis Palau den tatembangbuba asüpila sentong agi



2018 kûm sayaba, sayutsüngir Luis Palau takûm otsü film "Palau the Movie" poster noksa nung angur.

Washington, March 21 (Agencies): Anogo ishika tejaklen nüngtugu sayutsüngir, Luis Palau alima nungi pilaba sülen par kinüngertem aser medemertemipanüngtemnung Honibarnü tatembangbuba asüpila sentong agiogo.

Coronavirus wara aliba agi Honibarnü asüpila sentong nungji nisung ishika dang aden, aser iba sentongji facebook.com/luispalaulive aser Luis Palau indang memorial website luispalau.org. nung alima tesem ajaklen live yoka liasü.

Luis Palau Association-i, "Iba sentong nung adentsü atema registration menüngdak saka iba sentong nung online ajanga adentsü atema ajak pelaa agizüker," ta metetdakja liasü.

Palau'er jabaso, Kevin Palau-ia, "Asenok ajak adenshia iba sentong nung adenba tajungbasüla, ajisüaka online ajanga iba sentong nung adenba ajanga-a tetezü akettsü. Kûbui pa den asüpila sentong mapangji Kibuba nem tenüngsang agütsüba mapang

ka aser aser Pa (Tsüngrem) sentsüwangshidaktsüba mapangkasüdaktsünüa liasü. Yamaji onoki iba sentong agitsü," ta metetdakja liasü.

Iba sentong nung kentener, Matt Redman-ishilem agi aser kinüngertem den tembartemi o jembia liasü. Iba dak alia Chicago nungi Gospel Choir-ia temeja ken ka aten.

Memorial sentongji Honibar nikongdang 2:00 ako nungtenzü.

Arrshi kûm 86 sayutsüngir, Luis-i pa akümüli mapang nung media aser evangelistic sentong balala ajanga nisung billion ka dak tema den Yisu Khrista osangtajung lemsatepa liasü. March 11 nü pa alima nungi pila.

Nüngtugu sayutsüngir asür, Billy Graham'er tembar, Luis-i joko cancer tashidak atema treatment agiba anentsü asoshi telemtetba agiba sülen mapang tatsüka dang lirbo asü.

Tawa pa Portland-i meyipa aoba sülen par kibong den tesüsabuba monga liasü.

Pa ajanga takûm melenshir

aikati LuisPalau.org. ajanga pa nem akhüm agütsü aser kinüngertem den-a mangyim lemsatepa liasü.

Honibarnüsa pa nüngtem nung kaket 'My Life In Seven Words' saya aser taginertem nem iba kaket angati lemja liasü, ta Luis Palau Association-i metetdaktsü.

Luis ya 1934 kûm Argentina kûbok Buenos Aires nung asoba sülen 1990 kûm US-i oa ministry mapa inyak aser tesüsa Portland nung Luis Palau Association indang headquarters amenoker inyaka aru.

2018 kûm Luis Palau takûm otsü film "Palau the Movie" saya, iba sülen pai pa dak cancer tashidak putetba osang lemsatepa liasü.

Pai iba osang lemsatepba sülen pa kûm ana tashi treatment agia liasü.

Palau-i pa kinüngtsü, Patricia den jabaso asem-Kevin, Keith, Andrew, Stephen, aianu- Matilde, Martha, Catalina, Margarita, Ruth nunger aser adianu Jorge den semchir 12 toktsür pilaogo.

ANOGO ABEN TSÜNGREM DEN

KOTAK PA TALIDAK

"Yamaji parnok den jembir külen, Kibuba Yisu kotaki anir atu, aser Tsüngrem tachijilen amen." (Mark 16:19)

Yisu Khristaji Tsüngrem Chir ta kuli tajangjaji Pa tasü nungi shia arur pei talidaki anir atu. Yisu kotaki anir atuba ya tongtipang tatalokba ser nung asenoki iba temaitsü ta Palm Sunday, Good Friday mesüra Easter Sunday ama reta mamunger. Saka Yisu kotaki ayipa anir atuba ya tongtipang tatalokba ka lir.

Kechiba Yisu kotaki ayipa anit atu? Kuli kar itemi Mezüngbuba nung, kotakji pa talidak, aser Tebu den maneni longjema alitsü atema pa ayipa atu. Tanabuba nung, kotakji asenok pa chirtem ajak Khrista den longjemtsüba tesem ka lir. Iba asoshi asenok tanela nung renema atar. Kechiba asenok tashi anga, meshiteta, tanela renemshia iba lima nung ali? Kechiyong asenok khenü anogo Kibuba den kotak nung külemi alitsü aji asen teimla. Tasembuba nung, tebui pa mapang tatsüka asoshi tenyai yokba dang liasü. Pa tekümtet mapa renemer kotaki ayipa anir atu. Tanü tamanger shia asoshi teimlaji khenü anogo kodang iba lima timtem ajak süidir Yisu den pa talidak nung pelatepa ajuruteptsü. Pa ayipa mao asübo iba teimla makala.

SARASADEM

Kibuba Yisu na kotak nung lir, saka ne tanela onok den teti dena lir. Khenü onok ne den longjemtsü yimla atar. Amen

Syria nung IS teloki Khristantem densema tebur pongu puer ao

March 21, 2021: Syria linük nung Islamic State (IS) kiralongrartemi Khristan ana densema tebur pongu puer ao, ta osang ka ajanga metetdaktsü.

Syrian National Army ta ajaba Islamic State teloki Hassaka anasa Al-Ein jila kûbok Dwera yimdak ki ka nungi tebur kar puer ao.

"Sultan Shah Brigade" nungi züngsem kar kidangi arua Khristan, Naeem Malki puer ao; 2011 kûm Syria linük nung democracy pusema longkak aiter tongti lenirtem rongnung pa den par kinünger ka densema liasü.

Christian Solitary Worldwide (CSW) Middle East Advocacy Officer, Mina-i, item teburtemm dakji kechi ataloktsüar memetet, ta metetdaktsü.

"Parnok dak kechi ataloktsüar memetet, kechiyong parnok ya ozüng alema inyakba teloktem, kiralongrar teloktem aser ochimashirtem lir. Parnok samatsüa akok, mesüra reshikangshia tepsettsüa akok, mesüra pua yur tesülen chiochtsüa akok mesüra agütsür chiochtsü akok mesüra tepuokdak alir kar den melenteptsüa akok," ta metetdaktsü.

"Organization ka ama onoki Khristantem dang masü saka nisung ajak temeden kûmzüka ayutsü atema inyaker.

Tejakleni aotsü atema Syria nung yimtenren onük latettsü nüngdak. Linük nung democratic sorkar amenokba ajangadang senso ajak nem kasa temeden agütsütsü, aser iba atemaji alima linüktemia ajungshitsüla," ta Mina-isa metetdaktsü.

CSW tentetsang aser Tir, Mervyn Thomas-ia sangdong ka ajanga, "CSW-i maneni Turkey ketdangsertem dang northern Syria nung parnok kûbok aliba areas nung meimchir temeden balala akhümtsübütsü mepishir," ta metetdaktsü.

"International linüktem, talisa EU-i Turkey dang parnok kûbok aliba Islamic kiralongrar telok ajak azüoktsü aser region nung rara anenba den külemi meimchir temeden anema inyakba mapatem anentsü atema mepishitsüla. Syria nung civil war adokba sülen kûm 10buba nung ayaokdang tawa UN Special Envoy-i International linüktem, Security Council aser International system-i Syria nung nüburtem atema inyaktsütsü maparen nung tamakok anguba metetdaktsüogo. Onoki telok ajak dang Turkey-i atsünga agiba litsü meyipa agütsütsü aser yimjung aliba den ochi obendang agütsütsü atema inyaktsü mepishir," ta paisa metetdaktsü.

India kûbok yimtsüng ka nungi Khristan kibong ka mindok

March 21, 2021: India kûbok yimtsüng ka nung Khristan kibong kati Hindu nunger külemküja nung shilem agitsü memelungba aser Hindu nunger tsüngremtem külemtsü memelungba agi yimdak nungi mindok, ta International Christian Concern osang ajanga metetdaktsü.

Devi aser la kinüngbu Sunil Oraon nati Hindu yimsü toktsüba sülen Sunil'er tsüraburtemi la kanga amokmerena liasü.

Devi-i ashiba agi, lai la teko (kinüngbu tebu) dang lar kidang azü terükshi ta ashiba agi teko kanga jashia liasü.

"Kü kinüngbu tebui tekong kanga merang aser külemküja nung onokia shilem

agitsüla ta kü dang ashi. Ajisüaka ni tashi mangaba agi pai kü dak aou süng agi azük. Ni künü dang kü dak azükbaji nokdangang ta ashi, saka laia la kinüngbu dang pusema liasü," ta Devi-i metetdaktsü.

"Ni Khristan yimsü agizükba agi ni kü kinüngbu den tanurtem ashiochtsüogo, ta shia pai kü tekolak tangzüka tepsettetsü ta ni amokmeren," ta laisa metetdaktsü.

February 9 nü parnoki Devi dak azükba sülen la den lar chirnurtem yimdak nungi minzüka yok. Tasüngnü police officer ka yimdaki aruba sülen la dang yimdak yimsüsürtem tashi mangara aser Hindu nunger külemküja nung shilem magira pai la anema ken o benoktsü ta


metetdaktsü.

Devi-i police officer dang lar kinüngertemi la tepsettsü ta amokmerenogo, ajisüaka kechi südir süaka lar kibongi Khristan yimsü medoktsütsü ta ashi.

Tang Devi aser lar kibong yimtsüng among nung aliba arem nung jenoker kanga timtema lidar. Tzü atatsü atema anogoshia parnoki kilometer ana dak tema tetsüng agi jajar aser chiyungtsü alitsü atema parnok ket nung sen mali.

Yamaji süaka yimdaklirtemi maneni parnok amokmerener. March 13, 2021 nüa Devi kinüngbu Sunil'er tsüraburtem aser yimdaklirtemi lai tsük auyar, ta tai tonglokja la dak züka liasü.

OLONG PAITEP # 5760



TIPILEN

2. Teburtemi tejak nung awaba - (8)
 6. T _ _ _ em - (3)
 8. Tzük ayudak - (3)
 9. Nüngdakba dang timba - (6)
 11. Züina ao - (4)
 12. Yangi tzü angur - (5)
 14. Tangar dang nungi tali - (4)
 16. Senyong masü - (6)
 17. Oadokdi - (3)
 18. Tzü tarok - (3)
 19. Yimtaklir aikati iba ya ki den külemi yanglusemer - (8)

LANGTSÜNGLEN

1. Temejangdak - (6)
 3. Nisung ka mapa inyaksü nübo - (4)
 4. Azüntsü asoshi mejemba - (6)
 5. Tesangwa agütsüba - (5)
 7. Tila masü - (4)
 10. Tebenjem tetsür chanu - (4)
 11. Tekolak nung inok - (4)
 12. Tetsünga - (6)
 13. Tangar inyakba ka inyak - (6)
 14. Tim masü ta ashi - (5)
 15. Asalendong - (4)
 16. Tanüdagtsü - (4)

OLONG PAITEP # 5759 TELANGZÜBA

TIPILEN :

1. Telok, 4. Aluru, 6. Ozünga, 8. Emk,
 9. Kin, 10. Teti, 12. Süir, 13. Jen,
 14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
 5. Lenti, 7. Tajangzük, 11. Teronem,
 12. Sempa, 13. Jahaz.



ALOKBA ASER MOJING NA :

- Alok** - Mojing kechiba nai ozü lima ya Sodum aser Komurah lima dang nungia tamajung kümtsü?
 - Alok nenoki ni kanga mezügmeshia, ni mezüngoki nur limaji Khrista asoshi ta dang nangzük, ibayongji ni temeim bener ao aser merumero doktsü.
- Alok** - Mojing na kodaser züngsemtsü, onoki na koyimer, kechi nungi arua memetet!!
- Mojing** - Alok asenok ajak yimertem dang, kü lu nung nenok ayanga chiyonger nung, nenoki ni adakatem nungji ni yimjong bener ao aser tenukmeremteptsü doktsü.
- Alok** - Mojing nai kechiba onok yamai timtemdaksür??na ozü yimera masü ozü senmanger kata masü kenyongi ozü limai tarushi!?!aji masü nungbo tangbo kenyongi tai madoktsü?!!
- Mojing** - Alok nenoki yimkümdangbo ni aja, saka 1976 revival nungbo kenyongi ni langkoshishi merepdok aser nenok shingaia ni küm ana asem mepushi anungji ni teyaritep bener ao aser sen meimtsü doktsü.
- Alok** - Mojing na kanga kümdangang???joko nu jakla aser mapa ajak onoki metetogo, nai kechi sunura suang, onoki kodanga na magizüksü.
- Mojing** - Alok na? Ni sangya 2023 nungji arutsü idangjibo sen menungba kol dang bener arutsü aser shiba kü dangi arudir tila tulu mebandangi pei agishi sen peria agütsütsü kü terenemba lir.
- Alok** - Mojing na? ozü lima nungbo sa lirji.... na senpak kata memenungzük dang, kol ji kari aoyaa bener oadoker lira koda??!
- Mojing** - oh Alok aji adi. yimerbosa yimer adi!!!

Lilir - MSJ

AO OSHI ANGAZÜKDAK:

TANÜ ANGAZÜKTSÜBA OJANG



Alok

- (v) Tzü agi tokolak shitok (wash head / hair)
 * Lai shampoo amshia tekolak alok.

Metsük

- (v) Tzü agi teka shitok (wash hands)
 * Onok ajak chiyongtsü mapang teka metsük.

NAI-A YA METETTER MA?

AIR FORCE ONE

Gari junga anepalua amshitsü asoshi mapang shia 'maintenance' ji gari alir ajak atema kanga tongtibang aser nüngdakba maparen ka lir. Yamaji, US Tir ainlen senzusenbongtsü atema-a alakteta amshiba Air Force One indang SAM 28000 Boeing 747-200B tayimtsü tune-up/ maintenance asüba mapang iba tayimtsü mesük 'SAM 29000' amshir. Ajasünung, nüngdak adokba mapang US Tir senzütsü atema Air Force ana rongnung tayimtsü kabo teti dang renemer ayur.



TANÜBO NAI LANGZÜANG

Q. IRENA indang headquarters ya kong lir?

- A. Abu Dhabi B. Dubai C. Saudi D. None

===== (Taruba adok nung onoki langzüksü)

YASHI ADOK TELANGZÜBA : Minamata disease

SUDOKU # 5802

5	9							3	2	6	1	7	8	5	3	4	9
	6	4		8					7	9	4	3	1	2	8	6	5
7	8	2		5			9		5	3	8	9	6	4	2	1	7
	2		5	7		4			1	2	3	5	9	7	6	8	4
	5							2	6	8	9	4	2	1	7	5	3
9	7	6	4						4	7	5	8	3	6	9	2	1
					3	9	2	5	9	4	6	2	5	3	1	7	8
2	1					8	3		8	1	7	6	4	9	5	3	2
		5	2	6	9				3	5	2	1	7	8	4	9	6

TELANGZÜBA # 5801

OJANG LUTEP # 5347

JAYIMK	:						
NGBUNO	:						
NGKAA	:						
LUNGMUSOA	:						
RIYAR	:						
MAA	:						
YURSA	:						
ÜZÜMESKA	:						
AKAJ	:						
IADAGOK	:						

OJANG LUTEP TELANGZÜBA # 5346


ONÜK TASEN JEMBIYONGA AOTSÜ MELENA ONÜK
 KASAJI TALANGKA RASAA JEMBI

TAN HOPTA ATEMA - KOMA SÜLA ?

Q. JCPI teloki akangba ama tangsa tang 1963 küm 1st December nung ajemdaker, Nagaland Senso Register (Register of Indigenous Inhabitants of Nagaland) ka lapoka Nagaland sensosanger tenüng zülüok tenzük nunga koma süla ?

Olong 20 shi nung March 26, 2021 tashi nung iba telangzüba ya onok dangi (e-mail - tiryimyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.

BJP-i WB election manifesto saya;



March 21, 2021 nü Kolkata nung Union Home Minister, Amit Shah-i West Bengal assembly election atema BJP election manifesto sayatsüdü tangokba noksa nung angur.

Kolkata, March 21 (Agencies): Tan ita tatembanglen nungi West Bengal nung assembly election agitsü lia Amongnü Kolkata nung Union Home Minister, Amit Shah-i BJP indang election manifesto sayaogo; manifestso nung CAA özüng mapa küma inyaksü aser tetsürtem nem mapa shilem 33 agütsütsü nangzüka lir.

Manifesto sayaba sentong nung jembidang Amit Shah-i, "Onoki party manifesto dang 'Sankalp Patra' ajatsü lemteta liasü. Iba ya manifesto ka dang masü saka linük nung party tulutibai West Bengal nem bangzüng metetdaksüba shidi ka lir. Onoki state ya Sonar

Bangla kümdaktsütsü," ta metetdaksü.

Paisa, kodang onoki election nung takok ngudar state nung BJP sorkari tetsürtem nem sorkar mapa shilem 33 lemzüksütsü, ta metetdaksü.

BJP manifesto nungsa, West Bengal nung özüng alema aruba bendangertem alitsü memelatsü aser arrtsülen atsü nung CCTVs densema tanga osettem ayutsü, ta shia lir.

"Sorkar akümba sülen mezüngbuba Cabinet senden nung Citizenship Amendment Act (CAA) mapa küma benoktsü," ta Shah-i ashi. Shah-i iba oji jembiaika tang tashi Home Ministry-i iba Act

atema özüngtem meyanglu.

BJP manifesto nung nangzüka alibatem rongnung: tetsürtem nem sorkar mapa shilem 33 agütsütsü, AIIMS tasen asem amenoktsütsü, angopurtem nem küm shia sen 6,000 teyari agütsütsü, India-Bangladesh arrtsülen atsü tajungba küma yanglutsütsü, tetsürtem nem angati public transport agütsütsü, kibong shia nung nisung ka nem mapa agütsütsü aser 7th pay commission agütsütsü nangzüka lir.

Assembly menden 294 aliba state nung March 27 nungi tenzüka shilem ti lemsar election agitsü aser May 2 nü votes zünga election osang sangdongtsü.

Tanü nungi Rahul Gandhi-i Kerala election atema nübo ayimtsü

Thiruvananthapuram (Kerala), March 21 (Agencies): Kerala Assembly election agitsü mapang ana nung lia Congress lenir aser UDF atema nübo yimtsür tongti, Rahul Gandhi-i Hombar nungi tenzüka Congress-i aniba teloktep atema nübo yimtsütsü.

Hombar anüngdang 11:00 ako meta pa tayimtsü ajanga Kochi tonga arutsü aser kasa anogo nungsa pai yimti asem nung nüboyim sentongtem nung jembitsü aser Kochi anasa aliba

Alappuzha nung road show agitsü.

Mezüngbuba nung Rahul-i St. Teresa's College nung kaketshirtem ajurua jembitsü iba sülen Goshree junction, Vypeen aser Veli junction, Fort Kochi na nung shilem agitsü.

Nikongdang Rahul, Kacheripady tonga aotsü aser pai CPI(M) candidate, K Babu atema nübo yimtsütsü. Kochi nung sentongtem tembangba sülen pa Alappuzha-i aotsü, aser yangji pai Pattanakad (Alappuzha, Aroor aser

Cherthala), Cheppad, Haripad aser Kayamkulam nung senden balala amentsü.

Mongolbarnü Rahul-i Pala nung UDF candidate, Mani C Kappan atema nübo yimtsütsü.

Taruba Kerala election nung Congress-i aniba United Democratic Front (UDF) teloktepi BJP-i aniba NDA teloktep den tokteptsü.

Assembly menden 140 aliba state nung election April 6 nü agitsü aser May 2 n votes azüngtsü.

Tanü PM Modi-i 'Catch the Rain' campaign tenzüksütsü

New Delhi, March 21 (Agencies): Hombarnü World Water Day anogomong nung Ato kilonser, Narendra Modi-i "Jal Shakti Abhiyan: Catch the Rain" campaign tenzüksütsü.

Iba sentong nungjisa linük nung ayongtem sendakteptsü atema mezüngbuba project-Ken Betwa Link Project atema Uttar Pradesh Chief Minister aser Madhya Pradesh Chief Minister nati MoU sign asütsü.

Prime Minister's Office (PMO)-i sangdong ka ajanga, iba campaign ya linük tesem ajungalen yimtsüngtem aser jilatem nung benoka inyaksü aser iba mapatong atema omenji "catch the rain, where it falls, when it falls" asütsü.

Iba campaign ya tzungluruwa mongpu metenzükdang nungi iba tzungluruwa mongpu tashi-March 22 nungi November 30 tashi agitsü.

Nüburtemi iba mapatong nung shilem agia tzunglu tzu rizüngtsü atema grassroot level nungi inyaksü aser stakeholders ajak dang tzunglu tzu junga rizüngtsü atema tuyutsü, ta PMO sangdong ajangasa

metetdaksü.

Iba sentong tembangba sülen election agiba state tem dak alaka tanüngba state ajak nung aliba district shia nung gram panchayats senden mena tzu aser tzunglu tzu rizüngtsü dak sendakba nung o lemteptsü; senden nungsa tzu wazüka ayutsü atema tenangzüka agitsü.

Ken Betwa link project tezüngzüktep kübok state temi amalitepa inyaksü; iba ya taoba mapang Ato kilonser, Atal Bihari Vajpayee mangdang ataloktsür lir, kechiyong ayongtem sendaktepba ajanga tzu agi manüngtsü atema pa mangdang liasü, ta PMO-i metetdaksü.

PMO-isa, iba project ajanga tzu agi kanga anüngba region Bundelkhand, talisa Madhya Pradesh kübok Panna, Tikamgarh, Chhatarpur, Sagar, Damoh, Datia, Vidisha, Shivpuri aser Raisen district tem aser Uttar Pradesh kübok Banda, Mahoba, Jhansi aser Lalitpur district tem nung alirtem kanga tajangzük angutsü.



March 21, 2021 nü International Day of Forests anogomong nung Kolkata nung climate activist temi yimtenren party tem dang mopung menenba nokdangtsü atema inyaksü asoshi takhangba agütsüba noksa nung angur.

Lok Sabha Speaker Om Birla dak Covid putet; AIIMS nung mongdar

New Delhi, March 21 (Agencies): Lok Sabha Speaker, Om Birla dak coronavirus tashidak putetba sülen pa Delhi nung aliba AIIMS CovidCentre-i anir ogo; tang tashi nungbo pa junga dang lir, ta Amongnü hospital ketdangsertemi metetdaksü.

"Pa junga dang lir aser pa temang lenla ajak normal lir," ta All India Institute of Medical Sciences sangdong ka ajanga metetdaksü.

March 19 nü arrshi küm 58, Om Birla dak coronavirus putetba sülen tasüngnü pa AIIMS CovidCentre-i anir aru, ta kasa sangdong ajanga metetdaksü.

Ano külen tanga osang ka nung, tesüiba ghonda 24 tsüngda India nung ano nisung 20,693 dak coronavirus

putetogo aser tang tasen putetertemji shilem 83.14 bo state trok- Maharashtra, Kerala, Punjab, Karnataka, Gujarat aser Madhya Pradesh nungi lir, ta Amongnü Union Health Ministry-i metetdaksü. Tesüiba ghonda 24 tsüngda iba tashidak agi nisung 197 süogo aser asürtem shilem 86.8 bo state trok nungjagisa lir.

Tesüiba ghonda tsüngda state aser UTs 17 nungbo shinga dak-a coronavirus meputet, aser item states ji Rajasthan, Assam, Goa, Uttarakhand, Odisha, Jharkhand, Lakshadweep, Sikkim, Puducherry, Daman and Diu & Dadra & Nagar Haveli, Nagaland, Tripura, Ladakh (UT), Manipur, Mizoram, A & N Islands aser Arunachal Pradesh lir.



Mumbai, March 21, 2021: Taoba mapang Mumbai Police commissioner, Parambir Singh-i Maharashtra Home Minister, Anil Deshmukh nem tai tongloksüba dak sendakba nung Amongnü Thane nung Bharatiya Janata Yuva Morcha (BJYM) züngsemtemi minister anema longkak aitba noksa nung angur.



Myanmar mitkartemi tashiyim amshia sorkar atsüngdokba anema medical staff tem Mandalay nung March 21, 2021 anepdang longkak aitba mapang tangokba noksa ka yangi angur.

Myanmar nung doctor temi longkak ait tenzükshir

Mandalay, Metsüremi/March 21 (Agencies): Mitkartemi tashiyim amshia sorkar atsüngdokba anema Myanmar indang Mandalay yimti nung aliba doctor aser healthcare nung inyakertemi Deobarnep longkak ait tenzüka liasü.

Mizzima news portal ajanga video post sütsüba nung nisung noklang aika coat sentsü temesüing agir Deobarnep anü adokba mapang azüngmeyaka aliba yimtung nung jaja liasü.

February 1 nü mitkartemi sorkar atsüngdokba sülen linük ajungalen longkak aita aruba mapang nisung tajemba agi 247 tepsetogo, ta Assistance Association for Political Prisoners ajanga sangdonger lia iba rally ya ayongzük.

Asürtem ya ajak amai

prangbong agi kasetba lir aser timba tekolak nung akha.

Ano Monywa nung Deobarnü nisung telok kati lenmang nokdanga atsü yanglua alidak sepaitemi injang khaloktsüba mapang nisung ka kaset aser aika yiru, ta yangji aliba doctor temi osangbener dang ashi.

Azüdokshi tia tamajungba kumaka Myanmar nung aliba nüburtemi mitkartemi yimsü asüba anema nokdaksü temolungtetba nung lir aser yimya balala nung parnok anema nokdaker.

Deobarnep doctor tem yimtung nung jajaba den külemi Mandalay nung engineer temi "no-human strike" agia liasü, kong parnoki yimtung nung aser nüburtemi amshiba tesemtem nung nisung melena signboard tem

yutsür.

Honibar aonung aser Deobarnep linük nung tesem 20 shi nung temo milen tsükloka longkak aita liasü. Tesem kar nung longkak aiterem den Buddhist monk tema arua aden.

Linük balalai Myanmar mitkartem mapa anema ola adoker aser parnok nem tenokdangba agütsüogo.

Aji süaka tang tashi mitkartem molungjang nung tejembiba ka majiteter. November 8 nü election agiba mapang ashikülak mapa inyakba ajanga sorkar atsüngdok, ta mitkar lenir General Min Aung Hlaing-i shiogo. Iba election nung Aung San Suu Kyi'er teloki takok ngua liasü. Mitkar leniri election tasen agitsü nangzüka lir saka tang tashi angogo lateta mali.

Syria nung mitkartemi amakdang civilian aika tepset

Idlib, Metsüremi/March 21 (Agencies): Syria nung sorkar anema nokdaker aliba yimti tatembangba, Idlib nung sorkar indang prangbong aser injang tulu amshia amakdang mozüki ka nung kongshia tanur ka densema civilian pongu takum sama, ta Turkey indang defence ministry aser raraba mita reprangertemi ashi.

Sorkar anema nokdaker tashi ita alidak tesemtem wazüka ayutsü nükjidong nung 2020 kum March ita Russia-Turkey ceasefire yanglur liaka linük northwest tsütsü Atareb jila nung Deobarnü iba lendong ya atalok.

Injang aser bomb tesashi khaloktsüba ajanga longpok ka telung nung aliba mozüki leni aidak aser kima kongshia tanur ka aser mozüki nung inyaker ka densema civilian pongu tepset," ta Syrian Observatory for Human Rights ajanga ashi.

Healthcare staff densema nisung 11 yiru, ta Britain nung amenoka aliba Syrian Observatory for Human Rights indang tekolakba, Rami Abdurrahman-i ashi.

Mozüki ya ali telung nung lir, koba mepetmesü aliba

tesem nung tenük yokba nungi jenbutsü mechi opposition temi iba ama ya inyaker.

Idlib region nungya nisung million 2.9 lir, aser item nisungtem asemsü nungi anasü rara ajanga pei ki yutsür tesem balala nung jenoka lir, ta United Nations ajanga ashi.

Sorkar anemer telok busemer, Turkey aser sorkar den sendaktepa alir Russia nati anir taoba kum March ita ceasefire yangluba ajanga ita ishika mitkartemi sorkar anemba telok alidak maka civilian noklang aika tepset aser ano nisung million ka dak tema pei ki yutsür jena ao.

Iba region nung Russia hungeria tayimtsü amshia aiben maka ceasefire nung aibelena aruogo, ta Syrian Observatory ajanga ashir.

Iba rara mapang Idlib region nung aliba mozüki nung aiben kongshi, aser item lendong ya timba sorkar aser parnok den sendaktepa aliba sepaitem mapa lir, ta tenüing sena aru.

Syria nung 2011 kum March ita nungi tenzüka mozüki tajemba agi 350 nung lendong 598 ben atalokba

United States nung amenoka aliba Physicians for Human Rights ajanga asadangteta lir, aser item ya timba Syrian sorkar aser Russia densema par den sendaktepa aliba sepaitem mapa lir. Kasa kum 10 tsüngta medical personnel tajemba agi 930 tepsetogo, ta parnoki ashir.

2016 aser 2019 tsüngta Syria northwest tsütsü healthcare tesemtem nung 337 ben amakba World Health Organization ajanga tejangja osang bendena lir.

Deobarnü lendong ya sorkar anemertemi amokbanga alidak 2020 kum February ita sülen mezüngbuba atalokba lendong alitsü, ta yagji liba health directorate ajanga ashi.

2011 kum tenzükba civil war nungya nisung 388,000 dak tema tepsetogo aser ano million aika tesem balala nung prokshia lir.

Rara tenzükba sülen healthcare nung inyaker shilem 70 shi Syria yutsür jena ogo aser kum aika bomb poklokja aruba sülen mozüki shilem 58 dang mapa shidak inyaker, ta UN ajanga ashir.

Australia anüdoklen tzümetsüing agi kongshi

Melbourne, Metsüremi/March 21 (Agencies): Australia anüdok tzükümlen hopta tatemi tzüinglu kanga sashia aruba sülen kum 50 tsüngda tzümetsüing tesashitiba aruogo, ta ketdangsürtemi Deobarnü metetdaksü. Tzümetsü aruba sülen nüburtem aika item tesemtem nungi anintsüsa aküm aser kia noklang aika raksatsüogo.

New South Wales Premier Gladys Berejiklian-i, state nung tzüinglu aruba ya imlaa aliba dang nungi tesashiba liasü, aser talisa Sydney northwest len lenden nung aliba tesemtem tamajungba kongshiogo, ta ashi.

"Yashi onoki kum 20 tsüngda tzümetsüing tesashitiba arutsü imlaa liasü saka kum 50 tsüngda tesashitiba liasü," ta Berejiklian-i ashi.

Sydney northwest kübok tesem kar nung alirtem ayaterem nung pei ki toktsür aotsü metetdaksü, kechiyong tzü kanga kara ayimba ajanga teraksatsüba tulu bener aruja liasü. Berejiklian-isa, ano

nisung 4000 shi dang pei ki toktsür aotsü atema asüngdangtsü akok ta ashi.

Television aser social media footage balala ajanga tzümetsüing agi ki aser lenmang mobangba den süngtong aser lenmang nung infrastructure tem raksatsüba sayuogo. Emergency services-i ki noklang dak tema raksar alitsü ta asatetogo.

State nung lenmang tongtibang aika shibangogo aser school aikati Hombarnü class magitsü atema osang agütsüogo.

NSW kübok Hunter densema tesem 13 nem tzümetsüing lendong ataloktsü tekümdangtsü den item tesemtem azüngtettsütsü atema osang agütsür liasü.

Warragamba densema tzünokdang aika moshia yimdar aser iba ajanga ayong aika metsüingogo.

Meteorologists temi, tzüinglu Deobarnü tepeyong arutsü ta takzüa lir aser tesem kar nungbo tzüinglu 200 millimetres (7.9 inches) tashi arutsü.

Pak-i linük 12 nem senzüsenpongtsü tenokdangba agütsü

Islamabad, Metsüremi/March 21 (Agencies): Linük nung coronavirus tashidak menar tali akümba azüoktsü nükjidong nung Pakistan-i, South Africa, Rwanda aser Tanzania densema linük 12 nem senzüsenpong tsütsü tenokdangba agütsüogo. Deobarnü Pakistan nung nisung 3,667 dak tashidak poteta tashidak menar 626,802 jungogo.

Civil Aviation Authority (CAA)-i, South Africa aser Brazil nung tashidak tapu tasen adokba sülen linüktem A, B aser C ta telok asem küma lemsar list tasen ka sangdongogo aser C telok kübok linük 12 nem senzüsenpong tsütsü tenokdangba agütsüogo.

S e n z ü s e n p o n g t s ü tenokdangba aser linüki passenger tem maitdaksütsü atema linük 12 nem tenokdangba agütsüba ya March 23 nü nungi April 5 nü tashi benoka inyaktüsü.

Botswana, Brazil, Columbia, Comoros, Ghana, Kenya, Mozambique, Peru, Rwanda, South Africa, Tanzania aser Zambia nung category C küboki aйдaksüogo.

CAA sangdong ajangsa, category C linüktem nungi Pakistani nüburtem khenyongi marudaksütsü, kong taoba mapang Pakistan passport bena alirtembo aйдakja aliba

dena agintsüogo.

Pakistan nung COVID-19 tashidak prokshia aoba nokdangtsü nükjidong nung item jenjangtem agi, ta CAA-i metetdaksü.

CAA-isa, linüki arurtem atema category C update sütsüogo aser United Kingdom category C nung aliba nungi category B-i yokogo ta ashi.

CAA-i ashiba agi, category A linüktem nungi arurtem Pakistan-i mait tsüngda COVID-19 PCR (polymerase chain reaction) test sayutsü menüngdaker.

Australia, Bhutan, China, Fiji, Japan, Kazakhstan, Laos, Mongolia, Mauritania, Morocco, Myanmar, Nepal, New Zealand, Saudi Arabia, Singapore, South Korea, Sri Lanka, Tajikistan, Trinidad and Tobago aser Vietnam nung category A nung lir.

Category A nung maliba linüktem nungi nüburtem Pakistan-i maru tsüngda COVID-19 tashidak tendangtsü nüngdaker.

Kasa mapang nung National Health Services-i taoba ghonda 24 tsüngda positivity rate 8.74 ajungba metetaksüogo aser nisung 44 asüba sülen tang tashi nung tashidak agi asür 13,843 jungogo. Maneni nisung 581,852 anepogo aser nisung 2,900 kanga mejungi shirangdar, ta metetdaksü.

Phek nung 'Ethnic Fashion Show' sentong agiogo



Kohima, Metsüremi/March 21, 2021 (TYO): Phek Town Hall nung Hokolbar nikongdang 'Ethnic Fashion Show' sentong ka 'The Modern Tribe' omen nung ajemdaker ayonga agiogo. Vogue Entertainment Nagaland (Phek District Beauty Pageant indang official organiser) den Phek district administration, DLCW- Mahila Shakti Kendra, Beti Bachao Beti Padhao, Phek tawabangba kübok iba sentong ayongzüka liasü.

Tetsür tanurtem ajungkettsütsü aser fashion ajanga tetsürtem tali jangjatsü asoshi iba sentong nükjidong lir. Iba sentong nung model tain temi shilem agiba dak alaka, show nung tetsür tanur kati designer temi yangluba sübosülemtsü semer ramp nung mezüng shilem agiba nguogo. Iba show nung shilem agir designer rongnung Vilhousa Movi, Mesulou Thele, Mulutalu Chuzho, Aso Tsurho, Ken Dzüvichü, Selavolu Thisa, Vebulu Swuro aser Amini Ngulie nunger dena liasü. Iba show ya Miss Nagaland, Vikuonuo Sachu ajanga achaayanga aser direct süa agi. La den külemi Shefuvi Pfithu, Miss Phek, Munulu Chuzho Miss Phek 1st runner up aser

Rangulu Keyho Miss Phek 2nd runner up nungeri shilem agiogo. National People's Party, Nagaland president Dr. Andrew Ahoto Sema ya alakteta tejaoker ama sentong nung aruagi aden aser Phek Deputy Commissioner Razouvolie Dozo-ia sentong nung dena liasü. Dr. Andrew-i, mapa meranga inyaksü asoshi tanga lenmang mesüra tasa mali, anungji temulungtetba tulu yur akhang akhnaga noktaker inyaksüla, ajiasünungang takok angutsü asoshi lenmang tem lapok yonga aotsü, ta ashi. Pai ashiba agi, politics ya tamajung masü, saka nüburtemi shimtetba lennir kari ochishia yimsü asütsü melen pei atema bilema inyakba aser pei dang temaba asütsüsa mebilemdangi inyakdang aiben sorkar maparen nung tamakok ngüdaktsür aser tenüng tamajung bener arutsür. Iba olen dak sendakba nung, pai, tarutsü tajungba atema ochi meimba lennir tajung shimtsü asoshi lanurtem ayongzü. Pai ashiba agi, nisung ka tamakok anguba ya pei sasa ulua bilemba dak tuluka tsükdaker, ajiasünung iba shisatsü agentsü asoshi timi mera inyaksangshitsüla. Lennirtem dak pei lima

meimba tanela yangertsüla aser iba jagi alima tejakleni aotsü, ta pai ashi. "Koba temela/tezübaba ta masu" saka ochi aser shitak ajiteta inyaksüla, ta pai lanurtem ayongzüka liasü. Iba sentong nung Photographer: Terholhi Tsuha, videographer: Martin Khesoh, Event coordinator Michael Rhakho aser Production Manager ama Abebi Nuwiry nunger denogo. Sentong achaayanger team rongnung Vilenuo Kapu, Women Welfare Officer, DLCW- MSK Phek, Veposelu Naroh, District Coordinator, DLCW- MSK Phek, Avikuotho, District Coordinator, DLCW- MSK Phek, Vilhousa Movi, Joint Director VEN aser Diwe-u Thele, Joint Director VEN nunger dena liasü. Chitsiaro Po-i iba show sentong ketdangsüa agi. Shenieta Curhah, Zacukho Tetseo, Wewuzo Kapfo, Abel Thirah, Nukhoyi Stephen Rhakho aser Kukhrolo Kapfo nungeri iba show nung shilem agiogo. Vogue Entertainment Nagaland, Managing Director, Dode Nakro-i iba sentong yanglua aser achaayanga agiogo, ta sangdong ka ajanga metetdaktsü.

ASÜR BILEMTETBA ANOGO

2:04:1936 – 22:03:2020
T.Matsüngtetla (Yaongyimsen)

Na tetemjen arishi küm 84 aliba mapang jembiba nü temeim O aser nai inyakba mapa tajungtem onoki bilemtetter aser kodanga amatsü makok.

Tanü onoki na menungraa aser Tsüngrem nem tetushi agüja sarasadema amonger.

- Chirnur & Semchir & Kinungertem.

India nung 'Micromax IN 1' saya



New Delhi, Metsüremi/ March 21, 2021 (Agencies): India indang smartphone yangluba company Micromax-i Micromax IN 1 ta nüngja agütsüba 'Made in India' smartphone tasen ka sayaogo. Iba smartphone ya November 2020 nung sayaba Micromax IN Note 1 aser Micromax IN 1b den tatongtep alitsü. Micromax IN Note 1 aser Micromax IN 1b ama Micromax IN 1 nung MediaTek processor angutsü, saka smartphone tesülen triple camera system ka inoka yanglutsüogo, kong 48-megapixel shooter ka angutsü. Iba phone nung 5,000mAh battery aser tesülen fingerprint scanner keta lir. Virtual ajanga iba smartphone sayaba sentong nung, Micromax chief Rahul Sharma-i, iba "blockbuster" Micromax IN1 ya metallic finish agi meyibanga yanglutsü aser battery tuluka den phone ya 8.99mm tapu lir. March 26, 2021 nungi tenzüka tejangrartemi iba smartphone alitetsü. Iba smartphone ya sentsü ana - Purple aser Blue den metallic finish aser 'X' pattern nung angutsü. India nung Micromax IN 1 4GB RAM aser 64GB storage model jenjang sen 10,499 aser 6GB RAM den 128GB jenjang sen 11,999 alitsü. Gurugram nung amenoka aliba company yagi iba smartphone base model atema 'introductory price' sen 9,999 aser top-end model sen 11,499 (sale mezüng anogo) yong agütsütsü renema lir. March 26, 2021 anügdang 12:00 nungi tenzüka customer temi smartphone ya Flipkart mesüra Micromax offline aser online channel tem ajanga angutsü. Design tsütsü reprangdangra, Micromax IN 1 tereprangtsü Micromax IN Note 1 ama tejaklen hole-punch

cutout aser tesülen rectangular module aliba angutsü. Iba phone nung 6.67-inch display den 2,400 x 1,080 pixels (Full-HD+ resolution), 440 nits brightness aser 20:9 screen ratio inoka yanglutsüogo. Iba screen panel nung Rainbow Glass protection inoktsüogo, koba Corning Gorilla Glass 3 den kasa alitsü. Micromax IN 1 phone telung nung MediaTek Helio G80 processor den Mali G52 GPU - 950MHz, 6GB RAM aser 128GB storage dena lir. Camera tsütsüreprangdangra, iba smartphone triple camera setup nung 48-megapixel primary wide camera, 2-megapixel macro camera aser 2-megapixel depth sensor angutsü. Iba camera app nung night mode, white balance aser HDR tasen inoka yanglutsüogo. Noksa tangoktsü janngar temi 'PRO' mode amshitetsü aser noksa tem RAW format nung yutetsü. Ajisüaka, phone tejaklen selfie camera atema company ajanga osang tejangja ka magütsüi lir. Micromax-i ashiba agi, smartphone tasenba nung ad-free aser bloatware-free stock Android experience angutsü. Micromax IN 1 ya Android 10 out of the box ajanga achaayangtsür aser company ajanga ashiba agi taküm May ita nungi iba phone atema Android 11 update agütsütsü. Maneni, iba phone nung battery tasazük 5,000mAh alitsü, koba ajanga 18W fast charging support asür. Company-i ashiba agi, Micromax IN 1 khen charge nung ghonda 18 video playback mesüra ghonda 24 web browsing süteter. Tanga feature tsütsü reprangdangra, iba smartphone nung Bluetooth v5.0, dual-band Wi-Fi, 4G, 2X2 MIMO Carrier Aggregation aser tanga aika angutsü.

'Pushpa' nung Faasil-i shilem agitsü




Mumbai, Metsüremi/March 21, 2021 (Agencies): Malayalam star Fahadh Faasil-i Telugu star Allu Arjun den "Pushpa" nung shilem agitsü terenemba lir. Taruba multilingual action thriller movie nung Faasil-i nisung tamajung ka ama shilem agiba angutsü. Iba film ya Sukumar-i zülua aser direct asütsü. Faasil dak sempet tajung aliba asadangteta,

Mythri Movie Makers indang Producer Naveen Yerneni aser Y Ravi Shankar nati pa nem tenüsang agütsü aser iba film cast rongnung tenati pa pelashishia aniok. "Film balala ajanga Fahadh Faasil-i audience tem entertain süa peladakja aruba den külemi telengzüba tajung aika nguogo. 'Pushpa' atema onoki pa pelashishia agizüker. Pai iba film

nung nisung tamajung ka ama shilem agiba ajanga audience tali atsüa arutsü imlaa atar aser pa dak iba role ya tetemsü," ta sangdong ka ajanga film yanglurtemi lemsatop. Faasil-i nüngtugu film talisa "Bangalore Days", "Kumbalangi Nights", "Super Deluxe", "Trance" aser taoba küm lockdown mapang anena ayuba project -"C U Soon" nung tongti shilem agiogo. Maneni, "Pushpa" nung Faasil dak alaka actor talisa Rashmika Mandanna, Dhananjay aser Sunil nati tongti shilem agiba angutsü. Muttamsetty Media den Mythri Movie Makers longjemer yanglutsü aliba film ya taküm August 13 nü sayatsü sentong lir. Iba film ya Telugu den Tamil, Hindi, Kannada aser Malayalam nung sayatsü.

Alexander-i Acapulco ATP Title kokogo



Metsüremi/March 21, 2021 (Agencies): Second-seeded Alexander Zverev-i Honibarnü Acapulco, Mexico nung ATP hardcourt asayamung final nung 6-4, 7-6 (7/3) agi top-seeded Stefanos Tsitsipas kokogo.

Germany nunger asayar shiba alima ajunga nung asayartem rongnung jenjang tenetbuba nung lir, pai world number five Greece nunger asayar ya taoba mapang ponguben tashi atonga mekoki liasü.

Final asaya nunga Zverev-i asaya makoktsü ama bilema liasü kechiyong pai pa indang mezüngbuba service game makok aser 4-1 agi tesülen liasü.

Ajisüaka pai asendenshir game trokbuba nung break

points asem tashi kümzük aser pa indang serve merakzükdaksüi asayaba sülen game pongu atonga koka mezüngbuba set akok.

Tanabuba set nung Zverev-i mezü serve break asü aser 5-4 agi pa tejakdang akümba sülen asaya akoktsü atema serve asütsü maongka liasü. Ajisüaka Tsitsipas-i match point ka kümzuka maneni asayatsüsa aküm.

Iba sülen nungi tiebreaker tashi tena kanga toktepa asaya aser Tsitsipas-i break points trok tashi kümzükta 6-5 aküm aser 6-6 maküm tsüngda Zverev-i set point ka kümzük.

Zverev-i tasembuba match point anguba aibelen mesüi

koka asayamung akok, koba 2019 küm final nung Australia nunger Nick Kyrgios mekoki tanabuba jenjang nung tembangba dang nungi jenjang ka agi tajungba liasü.

"Iba takok ya ni atema kanga tongtibang," ta asaya tembangba sülen Zverev-i ashi.

Pai ATP title 14 koktetogo aser 2021 küm mezüngbuba asayamung kokogo aser taruba hopta tenzüksü aliba Miami Masters nung nüngtugu asayar Novak Djokovic, Rafael Nadal, Roger Federer aser Dominic Thiem nungeri shilem magitsü telemtetba agiba sülen iba asayamung akoktsü imlar rongnung pa-a ka kümogo.

Tsitsipas, shiba Australian Open aser Rotterdam nung semi-final tonga asayaago, pai final kokra ATP title trokbuba akoktsü liasü.

2015 küm sülen tang mezüngbuba Acapulco final nung top two seeds asayar ana asayaba ajangshiogo. 2015 küm second-seeded David Ferrer-i top-seeded Kei Nishikori straight sets nung koka liasü.

India tebur aser tetsür team-i Gold angu

SHOOTING WORLD CUP

New Delhi, Metsüremi/March 21 (Agencies): Tang New Delhi nung asayaa aliba ISSF World Cup nung Deobarnü India tsür Manu Bhaker, Yashaswini Singh Deswal aser Shri Nivetha Paramanatham nungeri tetsür 10m Air Pistol Team event nung gold medal nguogo aser kasa mapang nung tebur team nung Saurabh Chaudhary, Abhishek Verma aser Shahzar Rizvi nungeria tebur 10m air pistol event nung gold medal ngua liasü.

Dr Karni Singh Shooting Range nung India tsürtemi gold medal round nung point 16 nguteta Poland tsür Julita Borek, Joanna Iwona Wawrzonowska aser Agnieszka Korejwo nunger madak takok angu, shirnoki point 8 nguteta liasü.

Tanabuba qualification nung India team-i point 576 angu aser Polish tsürtemi point 567 ngua liasü. Mezüngbuba qualification nung India tsürtemi series trok nung 290, 287, 288, 287, 293 aser 287 ngua 1731 score asü aser Po-

land-i 286, 283, 286, 286, 286 aser 287 nguteta 1701 score asü.

Tebur final asaya nung Vietnam tenüng nungi Dinh Thanh Nguyen, Quoc Cuong Tran aser Xuan Chuyen Phan nunger asaya. Chaudhary-i aniba team-i tanabuba qualification nung point 579 angu aser Vietnam nungertemi 565 angu. India team-i mezüngbuba qualification nung ajak senteper point 1750 angu aser Vietnam-i 1708 angu.

Deobarnü-sa India nunger Aishwary Pratap Singh Tomar, Deepak Kumar aser Pankaj Kumar nungeri tebur team air rifle event nung silver medal ngua liasü.

Gold medal round parnok asem senteper point 14 angu aser United States nungi Lucas Kozeniesky, William Shaner aser Timothy Sherry nunger sülen tanabuba jenjang nung tembang.

Tetsür air rifle event nung India team nungi Nisha Kanwar, Shriyanka Shadangi aser Apurvi Chandela nunger pezübuba nung tembanga liasü.

BCB-i ni mashiyimi angatet: Shakib



Metsüremi/March 21, 2021 (Agencies): Nüngtugu all-rounder Shakib-al-Hasan-i, pai Sri Lanka den Bangladesh team nungi test asayatsü melena IPL nung asayatsü telemtetba agiba ya Bangladesh Cricket Board (BCB)-i mashiyimi angatet, ta ashi.

World Test Championship nung toktepa asayatsü atema Bangladesh team timla mali asünung IPL nung shilem agiba tajungba asütsü, ta Shakib-i ashi, kechiyong iba ajanga taküm India nung asayatsü aliba T20 World Cup atema pa nem teyari agütsütsü.

"Iba test asaya ana ya onok atema World Test Championship nung tatembangbuba asaya lir, anungji onok final tonga asayatsü tamasü," ta Shakib-i Cricfrenzy dang ashi.

"Onok points table ponglang nung lir anungji iba asaya ajanga kecha balaka temelenshi madoktsü ama bilemer.

"Medenser India nung taküm World Cup T20 asayatsü lir. Iba ya kanga

tongtibang asayamung ka lir kong onoki takok tajung ngutettsü. Test asaya ana nung ajangzüksü aikabo mali. Asayamung tuluba ka atema ni renemtsü tajungba asütsü," ta pai ashi.

Shakib-i BCB dangi shiti ka nung pa T20 World Cup atema renemshitsü sentong aliba lemsatepogo.

"Nüburtemi iba indang (SL den Test masayaba) maneni jembidar. Shirnoki ni Test ojang dang asayatsü ta jembir parnoki shiti junga mazüng.

"Ni kü shiti nung Test masayatsüba indang kecha shisema mali. Ni shiti nung World Cup atema renemshitsü atema IPL nung asayaner ta shia lir, ajisüaka Akram Bhai (BCB cricket operation chairman)-i ni Test masayaner ta shijen ashir," ta pai ashi.

October ita T20 World Cup asayatsü renemer aliba mapang Shakib-i, taküm IPL asayaba ajanga kanga ajangzüksü, ta ashi.

"Ni IPL asayaba tesem nung ita pezü lir World Cup asayatem asayatsü. IPL nung asayaba asayartem den ni World Cup nung asayatsü.

"Iba ajanga Bangladesh nung asayartem ajak rongnungi kü nem tajangzük tali agütsütsü aser ni iba asayamung nung shilem agiba tajangshibatam team den lemsateptsü atema kü nem teyari agütsütsü," ta pai ashi.

England ODI Squad: Jofra Archer, Joe Root meshim

Metsüremi/March 21, 2021 (Agencies): Jofra Archer tekatsüla yiruba sülen taruba hopta nungi India den asayatsü aliba ODI series nung masayatsü, ta Wales Cricket Board-i Deobarnü metetdaksüogo.

Arishi küm 25 tain asayar ya temang anepalutsü atema kidangi meyipaago. Pa yiruba ajanga taruba ita tenzüksü aliba Indian Premier League nunga tetenzüklenbo masayatettsü.

"T20 asayamung asayayonga aoba mapang Jofra tekatsüla nung timtem aliba tamajungba kümyonga ao aser iba ajanga pa junga masayateti aküm. ODI series nung asayatsü atema pa temsüa mali ta asatetogo, koba March 23, 26 aser 28 nü asayatsü lir," ta ECB-i sangdong ajanga metetdaksü.

"ECB medical team-i asayar ya asadangtsü aser Jofra den angatetepa temang anepalutsü atema aser tanaben asayashitsü asoshi sentong yanglutsü. Ibayongji pa taküm Indian Premier League tetenzüklen shilem magitettsü," ta kasa sangdong ajanga metetdaksü.

Kasa mapang nung ODI atema England team nung Joe Root-a densema mali,



kechiyong pa Test series tembangba sülen Kidangi meyipaago.

T20I series nung reserve asayar ama aniokba sülen England nunger leg-spinner Matt Parkinson team nung aniokogo. Kasa mapang nung batsman Dawid Malan aser pace bowlers Jake Ball o Chris Jordan nunger reserve nung yua lir.

ODI asaya asem ya Pune

nung March 23, 26 aser 28 nü asayatsü.

England ODI Squad: Eoin Morgan (captain), Moeen Ali, Jonathan Bairstow, Sam Billings, Jos Buttler, Sam Curran, Tom Curran, Liam Livingstone, Matt Parkinson, Adil Rashid, Jason Roy, Ben Stokes, Reece Topley, Mark Wood

Reserves: Jake Ball, Chris Jordan, Dawid Malan.

BILEMDANGANG

"Taküm arishi pei kabuma nung mali."